

docsriver 文川网
入驻商家 古籍书城
在文川网搜索古籍书城 获取更多电子书

〔清〕舒位撰

曹光甫 點校

瓶水齋詩集

下

上海古籍出版社

瓶水齋詩集卷十

玄默闍茂

鐵簫歌贈朱亦林

鐵厚一寸射而洞，驚起秦臺紅尾鳳。乘風飛度廣寒橋，霓裳法曲傳靈簫。生不逢東坡居士遊赤壁，清風明月無聲色。更不見淮南書記吟青山，二十四橋春夢殘。爐火温暾唾壺缺，不鑄黃金鑄白雪。深山大澤無人蹤，一斛珍珠六州鐵。不知誰冶南陵梅，秋色寸寸繞指來。蒼龍紫蚓繡苔苔，錦繡穿月紛葳蕤。四壁成都小垂手，玉律春寒消九九。吹參差兮續離騷，爛嚼紅霞口戕口。節之以岑牟金石漁陽搥，和之以大江東去銅琵琶。銀河吹笙小兒女，矧乃人世雙紅牙。蕤賓一方何處得，胡牀三弄無人識。不如舞作王鐵槍，省倚市門饒乞食。

青衣孫福以其所作和穆湖主人詩來謁穆湖蓋王仲瞿所居仲

瞿去年留詩南下乃詠落花者今攬屬和延佇瓜期其佳句若

韶華一度蜂含蜜心事三春燕剩泥亦仲瞿之所欲言也爲書

一詩付之

自有春愁自不知，生花筆寫落花詩。蛟龍波浪迷前路，桃李與臺戀故枝。屋上雌

雄鳥亦好，社前風雨燕猶遲。分明一樣琵琶語，忍俊明妃獨去時。余前詩有「琵琶彈出雁門

關」句，福亦云「中原無地葬明妃」，尤妙。

陳檢討填詞圖

萬口歌塵一手填，花無聊賴酒無邊。人間白髮三千丈，袖裏烏絲五十弦。謚作洞

簫王諫議，傳來井水柳屯田。忍將詞賦拋絲竹，到底中年勝暮年。

虬髯鴉髻兩絲絲，畫出剛逢禿阿師。樂府雙聲南北調，洪昉思題南曲一套，蔣心餘題北曲

docsriver 文川网
入驻商家 古籍书城

在文川网搜索古籍书城 获取更多电子书

一套。制科千載後先時。朱竹垞分書填詞圖，袁子才爲序。三生不作無情物，一卷能行本事詩。
想見傳神阿堵裏，閨年留得好春遲。圖成於康熙戊午閏三月，釋大汕所寫。

身世中吳少保孫，辟疆風調似梅邨。檢討詩：二十以外出入愁，飄然竟從梅邨遊。東山絲竹
棋無局，南部烟花扇有痕。素女圖中顏色好，黨人碑後姓名存。泥他銷暑重裝者，絲
繡香熏記此門。

當年閒寫太無聊，紅倚芙蓉綠坐蕉。杜牧狂言驚一座，馬周火色過三朝。梅杓司
詩：「朝來日者橋邊過，爲許功名似馬周。」殘山賸水還留戀，對影聞聲未寂寥。直得梅花詩百
首，此魂銷後又重招。

朱野雲擬陶詩屋圖

飄泊張融岸上船，商量支遁買山錢。除非一箇陶元亮，想要歸家便有田。

朱公從此擬陶公，三徑斜陽畫不紅。肯畫桃花與流水，便應招我此圖中。

仲瞿至自吳門頃走訪之忽移寓護國寺旁嫌其與弊居稍遠以

詩達意

一年南北又花開，鏡下芙蓉笛裏梅。誰與公榮飲酒者，恰逢匡鼎說詩來。每當會合思聯句，爲愛居停近辯才。只在東華門裏住，轆轤惆悵送人回。

畫船短簿祠前月，笨轂長安道上風。月色到船江水白，風聲轉轂市塵紅。人天離合情何限，爾我悲歡事不同。若肯出門西向笑，橫街只有此糊衲。余居彭二御衲，在橫街極西。

題仲瞿住穀城之明日謹以斗酒牛膏合琵琶三十二弦侑祭於

西楚霸王之墓詩後

彈斷琵琶一曲銅，小娘雲雨大王風。酒澆黃土魂來黑，詩咽烏江浪打紅。帳下美人歌駿馬，天涯兒女拜英雄。九原若有重瞳子，又見龍門太史公。

烟香灰劫閉佳城，未死千秋萬歲情。海內文章留杜默，江東子弟送田橫。龍蛇故國成何戀，雞犬新豐自可營。一谷泥丸三月火，果然草草殺韓生。

過橋三步舊東阿，鬼唱秋墳客渡河。宿草塵沙吳地盡，亂山絲竹楚聲多。蕭條宋玉招魂處，墓爲前泰安太守宋公思仁所修，立碑紀事。慷慨王郎拔劍歌。最恨神叢傳檄者，雌朝調語太蹉跎。

附原詩

王曇

穀城山曉黛蒼蒼，絃酌相逢拜憤王。百戰三年空地利，一身五體竟天亡。明分天下資劉季，誤讀兵書負項梁。留部瓠蘆全漢在，英雄成敗太淒涼。

秦人天下楚人弓，枉把頭顱送馬童。天命何曾私赤帝，大王失計戀江東。早摧函谷收圖籍，何必鴻門殺沛公。明縱咸陽三月火，讓他婁敬說關中。

黃土心香一菊塵，英雄兒女我沾巾。
生能白版爲天子，死剩烏江一美人。
壁裏沙蟲親子弟，烹來功狗舊君臣。
戚姬脂粉虞姬血，一樣君恩不庇身。

附同作

孫原湘

一杯熱血奠幽宮，空際靈旗颯楚風。
死有人爭分五體，生無天命枉重瞳。
范增不解留韓信，項伯徒知走沛公。
百戰河山成底事，誰將成敗論英雄？

玉玦三看赤帝愁，鴻門一誤又鴻溝。
無心殺季真仁度，并力除秦是本謀。
獨棄關中酬故將，平分天下與諸侯。
雌雄劉項分明在，本紀原應楚出頭。

杜默清狂有替身，檀槽鐵撥爲迎神。
敢將文字翻遷史，欲弔英雄用美人。
鬼馬怒嘶陰雨夜，山花紅作戰場春。
霸陵弓劍長陵土，一代忽忽萬劫塵。

贈王四少尹朝蘭

趙北攀楊柳，湘西聽鷓鴣。
與君離別久，況我性情疏。
弦誦拋年月，音書隔道途。
今朝相見晚，掩口笑胡盧。

蕭寺西廊下，紗籠一點塵。
山中無宰相，林下有夫人。
花氣過亭午，茶烟颺暮春。
牙籤三萬軸，觸手尚如新。

記得河間府，庭槐卧晚霞。
婆娑吟此樹，飄泊傍誰家。
白馬三更雪，黃河六月槎。
何如北窗下，跣脚鼓琵琶。

二十四福字，能停幾片雲。
子由空四海，阿買張三軍。
老話青苔榻，閒情白練裙。
城南韋杜曲，惆悵又斜曛。

團扇夫人曲爲王仲瞿孝廉題團扇圖有序

晉中書令王珉，悅嫂婢謝芳姿，婢製團扇詩贈珉，以珉嘗手持白團扇也。仲瞿分宗琅邪，質庶吳會，將於短主簿祠旁穿徑礮石，奉夫人香火。仍屬嘉耦雲門氏寫秋風小影，徵詩紀事云。

渡江桃葉春潮綠，腸斷青團扇子曲。秋風吹鬢又雙飛，明月纔懷才一握。誰家蝴蝶過牆東，銜出飛花一面紅。謫來天上氤氳使，留得人間蕉萃容。櫻桃樹下相思路，一撲流螢有人妬。祇應花裏送郎歸，胡爲泥中逢彼怒。團扇團扇淒以秋，不遮離恨只遮羞。縱然老婢聲能詠，還問小郎圍解不。嫂不爲炊有時有，叔亦不癡女無偶。未聞妲己賜周公，險把參軍配新婦。此事分明寶月團，此情惆悵綵雲端。阮家人種追無馬，秦女衣裳畫有鸞。班姬才調明妃色，卻扇千金傾一國。夢向烏衣巷里遊，歌從白紵詞中得。琅邪才子舊情癡，曳雪牽雲有所思。浮家恰傍真娘墓，畫壁先題后土祠。十萬鴛鴦兩團扇，婢學夫人君不見。願取朱陳邨裏人，化爲王謝堂前燕。石城艇子虎山橋，勸酒琵琶乞食簫。題成列女圖三丈，譜入神弦曲一條。

題昭明閣內史畫蘭扇子

絕代佳人老畫師，空山臭味不差池。
費他一滴金壺水，寫到花歌葉舞時。

半窗朱鳥閣春陰，深寫梅梢淡寫心。
絕憶湘人詞賦裏，雪花如片夜彈琴。

禊事纔修扇影多，天花香散墨池波。
阿儂家近蘭亭子，吹慣春風晉永和。

于忠肅公祠在表背胡同，即公故宅。

保邦容易保身難，如此頭顱擲一官。
誰遣兒童歌雨帝，終教天子坐雲端。
力翻北宋蒙塵局，事異西周禱疾壇。
留取數椽香火地，讀公前奏涕洟瀾。
公有辭賜第疏云：「況朝廷多事之秋，非臣子安居之日。」

手轉乾坤豈偶然，長安棋局劇堪憐。
周旋骨肉無書讀，斷送功名以夢傳。
相傳公爲

夢神。難采紫芝求四皓，騰開碧草染三年。澶淵孤注平城計，留與癡人夜看天。

朱野雲斷牆老樹圖爲石敦夫題

朱公示我斷牆老樹圖，石公索我斷牆老樹詩。之二人者我所思，之二物者我所知。一在極樂寺，一在太清觀。雞林宰相購真形，龍門太史作合傳。此牆此樹誠無雙，突兀一堆空一腔。彼牆彼樹徧天下，不斷不老不詩畫。獨不知築牆爲某年，種樹是何意。亦不知先築牆，後種樹？何在南城太清觀？何在西門極樂寺？牆如殘碑，樹如枯柴。牆斷若坐，樹老而卧。客之來兮秋涼，攬風景兮斷腸。幃丹青兮韻宮商，合則雙美兮離則兩傷。蓬萊清淺須彌小，嗚呼牆斷樹亦老。是牆是樹有絕期，非牆非樹無盡道，無有牆樹無有諸煩惱。胡爲畫之題之不肯休，一牆一樹名一愁。宿泥剥剥鬼所謀，孤根盤盤匠所讎。屐齒不到風馬牛，烟花點綴蟲雕鏤。咄嗟乎嘻吁！鐵圍山，攔不住；紅桑花，種何處？神仙換劫佛滅度，如是因緣不知數。一爲極樂寺中牆，一爲太清觀裏樹。此際無情似有情，此時有句如無句。若云面壁來，何不乘查去。

唐稚川表兄來京相見距癸丑歲別於沂州忽逾十稔感事述懷

不能無詩

與君去住各無邊，到此相逢亦偶然。上國春風三月底，東山零雨十年前。詩城堅壁愁能破，人海浮家恨未填。牢記心中千萬語，每當把臂具難宣。

高臺費盡萬黃金，但買荆軻一片心。睫在眼前難自見，肉生髀裏感人深。當歸草向山中寄，解語花從鏡下尋。只是一篇毛穎傳，誤他三世去來今。

十樣蠻箋寫未休，洪喬真作致書郵。替人言語終難肖，與我周旋始欲愁。舉案且教春廡下，稚川眷屬時僑濟南。捉刀猶自立牀頭。思量一事軒渠甚，不作家雞作野鷗。

清風涇上讀書聲，何苦天涯海角行。山水有功詩敗事，文章無福酒成名。戴逵門外通宵雪，謂戴松南姊登。余與稚川昔讀書清風涇上，同主其家。周昉圖中昨日鶯。此指爲稚川題梅仙

圖事，圖爲楓橋陳涇南秀才所寫。今松南、涇南皆已下世矣。抵得山陽思舊賦，一枝鐵笛老龍橫。

破被篇

讀書萬卷讀不破，走入破被堆中卧。雞既鳴矣凡幾聲，蝨其間者凡幾箇。或曰歷可棄，我不忘其敝。或曰衾可補，我非五雜俎。不相離別轉相親，我用我法橫自陳。芙蓉城裏蒙頭入，鸚鵡洲邊伸脚出。一年又一年，春秋冬夏無不然。萬里復萬里，東西南北而已矣。蜀錦重重無片段，吳綿團團逸其半。參來羅漢五百尊，幻出觀音十一面。彈斷銅琵琶，披出鐵袈裟。石破天驚逗秋雨，中有殘夢恒河沙。君不聞湖州唐六歌有口，又不見揚州朱八畫有手。唐猶及見未破時，朱獨相憐已破後。今茲襖被春明門，車如雞棲馬如狗。黃竹箱中什襲藏，青苔榻上周旋久。被兮被兮可奈何，世間破被有許多。安得盡遣朱八作畫唐六歌，我乃化爲蝴蝶夜夜飛天魔。

附破被詩爲鐵雲作

唐以封

昔年聚首楓谿曲，篝燈相對奇書讀。紈如五鼓始肯眠，破被蒙頭如蜩縮。後來

同買青亭舟，酷暑蒸人漿汗流。手推破被眠不得，河隄塌席驚沙鷗。水蚊無聲偷飲血，周身受困惟存舌。富貴難忘細席言，不許小兒脚踏裂。彈指別離逾十霜，相逢日下喜欲狂。雞鳴風雨如夢寐，齷齪破被仍堆牀。我因見之長太息，人生不如破被得。留君破被識君心，豈但功夫珍物力。爲想鴛機研錦時，中央四角寸心知。君今長物無過此，若遇平原再買絲。

附題破被圖

朱鶴年

冷被多年鐵打圍，杜陵舊雨送將歸。替他綵筆傳春夢，一夜鴛鴦破壁飛。

十年禪榻睡魔消，留得姜肱被一條。還似霓裳初出破，青天補石月修簫。

朱八野雲好畫古舊服物，見余破被橫陳，早便留意。及讀唐六稚川詩，欣然點筆，傳神阿堵，不啻冷暖自知。乃并書歌圖後，裝池以贈稚川。它日歸夢東山，當復一府傳看黃琉璃也。壬戌夏四月，鐵雲識。

題孫子瀟孝廉把酒祝東風種出雙紅豆圖

忽忽二十四番花，醉殺中山賣酒家。四壁芙蓉誰綠綺，一箱鸚鵡又紅紗。竟無消息金泥字，最有因緣玉畫叉。牢記鬱輪袍一曲，也應彈破舊琵琶。

世世燒成九轉丹，年年打就兩疑團。樽前種樹三生老，鏡裏拈花一笑乾。蓮粉空房心自苦，梅陰深院齒曾酸。箇中滋味能相似，青鳥飛來不許看。

吳興太守老填詞，寄與孫郎帳下兒。楊柳枝添殘月唱，旃檀香近逆風知。三條燭冷看成碧，九陌塵空化作緇。留得天王珠在手，殺花聲裏咒相思。

酣來擊筑餓吹簫，北轍南船兩路遙。住亦天涯仍咫尺，生猶同世未蕭條。軟紅風土花遮影，慘綠衣裳酒借澆。何不鴛鴦香火社，人天色相大家描。

雨夜與仲瞿讀子瀟天真閣詩集即書其紅豆圖後

讀曲生紅豆，題詩采白蘋。三杯無等况，一卷有情人。妙手文章得，離懷道路真。西窗今夜雨，點點細如塵。

憶我親朋字，論交孰可傳。王珉團扇底，孫楚酒樓邊。香占夫妻福，子瀟學詩於閩中，
仲瞿婦工畫。春參子弟禪。詩城過百雉，強似大羅天。

落花詩

一帽山花忽研光，看他同日詠霓裳。最難聽處三更雨，始欲愁時一陣香。珠玉九天殘咳唾，江湖滿地舊文章。白雲鄉裏分明路，錯認溫柔作故鄉。

年年紅陣戰蜂分，七寶牙幡偃暮雲。不倒除非錢樹子，遲開難舞鬱金裙。空枝裊裊簾前立，小草萋萋陌上熏。末路才人新寡婦，蔡文姬對卓文君。

docsriver 文川网
入驻商家 古籍书城

在文川网搜索古籍书城 获取更多电子书

隨藍風起徧天涯，點點恒河有數沙。
獨坐將軍留大樹，微吟宰相占梅花。
泥黃欲傍誰家燕，陰綠能藏幾箇鴉。
儂在傾脂河畔住，其地有落花橋。
者橋名字太繁華。

十二層臺百尺梯，綠章香案候潮雞。
碧憎霍霍雙鷹眼，紅踏荒荒四馬蹄。
仙爪太長桑換海，禪心漸老絮沾泥。
當初肯築移春檻，孤負金鶯恰恰啼。

殺風景事絕風流，錦樣年華水樣愁。
井底胭脂門外虎，林間裙屐閣中牛。
三通敗鼓催消息，九錫疑文費校讎。
宛轉蜣螂驚蛺蝶，糞英狼藉野花秋。

紫玉衣裳碧玉簫，浪傳生日是花朝。
殘燈飄蕩難成夢，冷酒淋漓不受澆。
一窖冬烘元氣盡，九邊春信笛聲驕。
不如捉住青鸞尾，萬斗香塵一擔挑。

月夜過蔣楚生刺史水月禪林寓居閒話並邀仲瞿歸宿見香室

攜續本事詩借讀一過作詩記之

豔絕虹亭本事詩，南朝金粉北胭脂。百年花月傷心語，一夜烟雲過眼時。繞座自參女子定，借書不讓古人癡。相看何物酬清興，鑪篆三熏燭半枝。

題長相思圖

長相思，遠離別。江南江北楊柳多，一夜東風落如雪。別君黃雲城，城頭日暮棲烏驚。思君白玉堂，堂中春深歸燕翔。水流花謝無顏色，天長地久無消息。昔爲卷中人，今爲陌上塵。昔爲素女符，今爲倩女圖。樂莫樂，新相知。愁更愁，長相思。相思者誰君知之，君不知之君別離。

南飛鷓鴣北飛燕，來時去時不相見。東邊日出西邊雨，無晴有晴不得語。不語不見豈不思，思之思之無已時。此身但恨別君早，此心直爲思君老。春雨落梅，秋風掃

苔。風雨如此，君胡不來。君不來，長相思。燭有淚，蠶有絲。

冥冥來上珊瑚牀，先爲蝴蝶後鴛鴦。入夢記夢出夢忘，夢短不抵相思長。古之傷心人，乃以巫峰一十有二處，朝朝暮暮爲雨雲。朝聞而東東，暮呼爲真真。還君明珠雙淚落，天上人間好樓閣。彈箜篌而聲淒，寫鳳紙而情薄。獨不見靈媧補天天乃漏，精衛塞海海更溜。死不必買青山，生不必種紅豆。爲君三疊長相思，一池春水多吹皺。

奚岡聽松讀書圖爲邵馥題

蒼龍參天萬風亞，石上流泉仰而迓。客有相賞松石間，橫掃鵝谿當結夏。君家半畝園，六月賣無價。我聽落花聲，年年被花罵。相逢一笑兩紅塵，歸去急將人面研。畫松之手能畫風，聽松之耳聽不暇。進可作謝幼輿，退不失蕭思話。或是王摩詰，科頭箕踞長松下，徑嚼松花與松化。攔出秋山青一架，君坐讀書我讀畫。

雜言八首與唐六稚川話別

別君已十年，見我無一月。於此唱驪駒，能無少留歇。春風吹酒旗，不飲醉兀兀。
千佛經之名，千里馬之骨。且當舸逐鷗，慎勿壁見蠹。

不挽兩石弓，彼一真福將。但讀半論語，此一賢宰相。老大畫蛾眉，蛾眉有十樣。
罪首王安石，鞠躬諸葛亮。秋烘而春烘，烘出冬烘匠。

行脚十萬里，不過一老僧。蠹魚不識字，三食道德經。海外碧海碧，山外青山青。
漢武欲成仙，梁武欲成佛。成仙生服藥，成佛死喫蜜。

雞鳴與狗吠，兄嫂當知之。鶴怨與猿驚，爵祿固可辭。不患名不立，而患德未滋。
事親無他道，但如初生時。交友無兩端，但如新相知。

我有絕交書，不畏錢神怒。黃標復紫標，後福前定數。銅山賜鄧通，枵腹難鼓鑄。金屋貯阿嬌，拆賣長門賦。兒女癩如雷，都爲兄所誤。

好名如好利，患失不患得。銅臭與餅香，一樣不可食。埋頭鑽故紙，字字如鴉黑。試問梅都官，弓衣何處織。下馬草露布，必上馬殺賊。

買酒不買醉，種花不種香。書券不書字，擒賊不擒王。飢亦知菽粟，寒亦知衣裳。身有七尺強，面有一尺長。如何一寸眼，乃無一寸光。

天地慳功名，英雄重離別。功名千百年，離別在一瞥。杏花雖自鬧，不如折柳絲。桃花雖自肥，不如采華芝。身非菖蒲花，會有相見時。

庶子法梧門先生枉顧並索題詩龕圖會脂車南下即此呈別

三生香火九州烟，遲到靈山二十年。北斗四星韓吏部，東風三月杜樊川。懷中書

刺都磨滅，篋裏恩情忍棄捐。屬寫團扇曲。惆悵史公牛馬走，鑿楹還有舊詩篇。來索先檢討詩稿。

絕頂茅菴最上乘，畫師詞客鬪谿藤。是誰說士甘於肉，有此居官冷似僧。石鼓巖宮前祭酒，玉堂青史夜然燈。東歸花樣殘絲曲，欲繡平原恨未能。

天涯芳草綠無痕，騎馬雞棲與重論。戶限功名多失意，選樓詞賦易銷魂。鶯花天上成千里，烟水江南又一邨。賴有鯉魚三十六，定隨秋浪到龍門。

答示仲瞿話舊之作十首

苦竹關山細柳營，中間篝火有狐鳴。丁巳，余偕王備兵自燕赴金竹軍營，行次許昌，遇教匪。兵符夜避紅娘子，女賊齊王氏由楚竄豫，焚掠保安驛，遂走武關。天榜春歸白玉京。己未，余還自黔，不及春試。海外東坡傳九死，方避賊時，有謬言余已被害。人間南斗注三生。襄城令巫宜福力勸北轅。傷心墨子回車地，冷聽霜鐘十八聲。返轡寓祥符大相國寺者二十日。

戰鼓隆隆雨點銅，苗俗最重銅鼓。岑山孖水古南籠。仲苗既平，詔改南籠府爲興義府。苗以山之高者爲岑，水分流曰孖。先生鬚髮三千白，逆苗韋朝元，綽號七絡鬚，爲偽軍師，衆稱韋大先生。媳婦頭顱八百紅。妖婦王囊仙，自稱皇僊娘娘，所率苗女甚夥。曾與諸侯觀壁上，不妨女子在軍中。土千總龍躍么妹年十八，驍冶無敵，常從征，多戰績。彼語以行次最稚者曰么。萬峯絕頂中秋月，親見裙刀殺賊功。七絡鬚、王囊仙並於八月十五夜就擒。韋據當丈，王據洞洒，皆巢穴之險峻者也。

檄曹難蜀勒燕然，千古文章好便傳。來詩：「才子文章山鬼泣。」自注：「作論皆苗文檄數十通，苗人識字者誦之，轉相告語，皆泣拜投誠，不復反矣。洞裏竟將生虎縛，閣中誰取大牛鞭。初，苗平，當事者以幕府賓僚列請議敘。余恥不具狀，而同時投効者三十六人，剔勝不已。雌雄劍老埋雙氣，長短書成贖七篇。不賞邊功緣底事，將軍福命相公權。時和揆領吏部，與威勤侯意不相中，疏入，格不能行。

漸漸秋風上短衣，東曹菰菜一舟飛。余從楚南、江右至浙。杜陵廣廈今無恙，借住沈松廬。

廉訪烏戍南華老屋，今已十年，而廉訪於去秋捐館矣，語次黯然。彭澤迷途昨更非。在軍中可殺作縣令，以當留黔需次，辭之。五角六張天上夢，千山萬水客中歸。浪遊不厭腰纏重，爲問揚州鶴可肥？

皋橋杵白夜無聲，仲瞿時寄家吳下。謬被公卿識姓名。霹靂編成方技傳，前都御史吳公，

仲瞿甲寅舉主也，疏薦仲瞿，語多不類。幸聖明洞察，有旨免究，僅將吳放歸田里。仲瞿詩：「百里雄雷留孝若，六州生鐵鑄顏回。」又：「中年霹靂驚王導，半片籬條覆庾冰。」皆紀實也。烟雲圍住美人城。仲瞿婦雲門氏，工畫。方仲瞿邁飛語時，人多不敢與之往來，雲門乃備筆自給，求者踵至，其畫亦由此益工。李陽大俠拳猶老，晉天水太守李陽稱京都大俠，石勒所謂飽卿老拳者，未必即此李陽。而仲瞿與今萊州太守李基同薦，故云。王衍清談掌自鳴。薦章稱：按掌作氣，辟易數十人。記否東西支遁巷，大羅天外兩書生。余時自黔還，訪仲瞿於支家巷。是歲余以期誤，仲瞿以事逮，故皆不與試。

海曲長沙笑口開，天然蹤跡不須猜。余偕佟方伯入楚，仲瞿仍寓吳門，每舉王子安滕王閣序中語爲笑。及辛酉重來都下，仲瞿贈詩云：「南北三千里，文章八十家。梁鴻辭海曲，賈誼別長沙。」吳娘暮雨瀟

瀟去，楚客秋風嫋嫋來。半部離騷山鬼識，楚人有祈夢於三閭大夫廟者，其籤詩皆摘取九歌中字句爲之。一聲檀板水仙灰。仲瞿嘗作王翠翹事傳奇，已付一炬。徑從花外揚鞭走，排出金銀太半臺。仲瞿自吳門至登州，登蓬萊閣，觀海市。又浮海，至大小欽山、沙門島。所撰七言律詩，若秦東門、望仙門及海市諸作，皆奇偉可喜。

畫鬼癡符選佛場，語言容貌兩茫茫。辛酉大挑見棄，榜發又遭擯斥，凡此兩人略同。升天雞

犬饒嘗鼎，有誦仲瞿乙卯落卷，襲其句調而獲雋者。起地龍蛇冷逼牀。去夏京師大水，余有辛酉紀雨詩，

仲瞿時已南歸，來詩所謂「送我南船抱白鼉」是也。食肉僧逢楚懷素，仲瞿還寓虎丘，與武昌鐵舟同住一榭

園，借書車訪沈東陽。余依天津令沈小如縣齋。暗中定有牽絲者，鮑老當筵笑郭郎。

吳船似屋與家浮，載得閭門一段秋。仲瞿嘗賃一舟，貯書畫妻子，動輒旬月，忍換浮名官

不許，仲瞿呈請禮部，改名蠡舟。宗伯達香圃先生曰：「蠡即螺也，螺舟老人，言近於夸，且非名而似別字矣。」

遂弗許。癖耽佳句賊能偷。余錄仲瞿七古詩一卷於篋衍，在袁州時爲鑽艙者舐篋而去。紅男綠女花三

昧，用雲門氏所撰虎丘四面千手觀世音對子中語。玉笛銅弦土一丘。仲瞿近所作唐六如墓及西楚霸王墓

詩，皆一時傑構。如此江山如此客，人言愁始我猶愁。余有題項王墓詩後三首。

忙過槐花又杏花，春明門外即天涯。文星墮地頑於石，老女當梁小似茶。來詩原

注：「唐制：子午卯酉爲當梁年，女子不嫁。故兩人遇之，皆不利。」余按唐人以茶爲女之美稱，元遺山詩：「學念新詩似小茶。」三轉男身新綠裏，來詩：「死胎三墮或生孩。」蓋仲瞿乙卯、丙辰、辛酉凡三中三斥云。一雙鬼眼舊紅紗。仲瞿去年留別詩云：「飄零吾敢恨，夫子尚紅紗。」分明歸燕曾相識，不記尋常百姓家。榜發不識一人。

漫說泥金帖子看，仲瞿題余硃卷詩云：「也買胭脂畫牡丹，買他容易畫他難。分明玉唾壺中物，只作泥金帖子看。」摩挲銅狄視刀鏤。磚門咫尺成千里，瓦屋東西住兩間。十種神仙逃赤籍，半房兒女累青山。仲瞿浙人，而嘗居吳；余燕人，而嘗居浙。不須折盡長亭柳，留與他人歲歲攀。

附來詩

王 曇

戎鼓喧天一柱銅，蠻鄉兵幕瘴鄉風。書生汗馬髀無肉，妖女囊仙血尚紅。才子

文章山鬼泣，婦人茶火大王雄。中年空橐從軍筆，不乞平夷一字功。

些些招魂不到家，青山白面又長沙。三閭血祭叢祠字，太傅承塵破廟花。賀老琵琶怨場屋，禰衡鸚鵡戀天涯。巴江烽火瀟江月，愁夢湘娥十二壘。

神龜風雨殺豬婆，送我南船抱白鼉。下第書生留大命，公車舉子踏天河。水官解厄城三版，仙女療飢米一螺。留得姜肱粗布被，大牀已被惡龍拖。

五色明珠一斛才，大羅天榜又橫開。紅紗古鬼魔宜退，老女當梁嫁也該。名將七禽終得賊，死胎三墮或生孩。金丹火字泥金紙，逼得燈光響爆來。

詩派

詩派圖成有別裁，江東羅隱又空回。雲英已嫁方干老，送出開門節度來。

出都之次日宿白溝示仲瞿

銷除水厄舞山香，秋雨春風各一場。社酒三杯送歸燕，車輪四角笑亡羊。連年襍
被人如夢，每夜篝燈話最長。比似來時差快意，不教關吏看詩囊。

半樹斜陽赴暮愁，白溝河水抵鴻溝。攔腰碧草埋酣戰，撲面紅塵悔浪遊。歌罷數
錢逢姹女，飢來傳食到諸侯。軒渠鑄錯桑維翰，一硯磨穿十六州。

題仲瞿重過西楚霸王墓詩後

一樹白楊風，開門葬魯公。人歸三月後，詩滿兩山中。駿馬魂猶汗，轅牛血可紅。
銅弦鐵綽板，重與唱江東。

附原詩

王 雲

大雞山後小雞前，馬血人燐一冢烟。白帝山河五十步，羊公碑版二千年。伯才

docsriver 文川网
入驻商家 古籍书城

在文川网搜索古籍书城 获取更多电子书

遇主談何易，轅下無牛祭不虔。亦有烏江歸去客，穀城山下又留連。

附同作

孫原湘

憤王墓上草先秋，如此興亡一哭休。七十戰纔餘寸土，八千人恨不同丘。時來雉亦烹功狗，事去人爭笑沐猴。顛顛孫郎重下拜，江東歸去有扁舟。

瘞僕篇

唐金保，臨桂人，病歿兗州，余爲瘞之城西門外觀音庵左側官隙地。既書其姓名里居生死年時於石，仍爲是詩存吾集中。

四月杏花飛，主人出郊宿。老僕載後車，睽睽張兩目。云是酒病發，低昂如醉竹。鬲上住已難，眉下然更蹙。蒸爲爛羊頭，波及河魚腹。苦口百味藥，搖頭半孟粥。行行重行行，錄錄復錄錄。廿七過盧溝，廿八憩涿鹿。十日抵兗州，端五及初六。攜僕入店眠，柅我一雙轂。三更燈熒熒，其氣時斷續。四更馬蕭蕭，五更雞喔喔。耳風鼻

火中，忽有血如漉。奄然卧而僵，日上黃茅屋。當時一杯酒，身外四周木。埋之陶家側，秋草淒以綠。生死有常期，痛爾無骨肉。爾生西南隅，爾死東北麓。事我十年餘，共我千里逐。隨爲係丈夫，旅乃喪僮僕。既掩張進骸，難繼易牙躅。僕精治肴饌。紙灰不直錢，酒債償已足。太息爲此詩，蕭條不可讀。

與孫子瀟席子侃王仲瞿登兗州城南樓

青衫葉葉寫風聲，古意躊躇五字城。亂世奸雄漢丞相，破牆絲竹魯諸生。雲連南北東西路，人有悲歡離合情。比似武昌樓上客，胡牀孤負月華明。

趙味辛司馬權知兗州置酒少陵臺送別

白首千間屋，青山百尺臺。懷人新舊史，送客淺深杯。東海浮雲去，南樓細雨來。三年笑皮骨，得句重低徊。

稷契空相許，風騷自總持。三篇大禮賦，一代盛唐詩。老尚依人慣，生應恨我遲。